

四庫全書

集部

欽定四庫全書

文山集卷九

宋 文天祥 撰

啓

上權郡陳通判高謝解

乙卯舉送時  
弟璧同薦

是邦大夫賢者聿新道藝之賓興吾黨小子斐然得過  
功名之主宰僧彌出法護之右越石居楚金之先人羨  
二難已叢百媿竊惟奎開我宋箕壽斯文堯叟以壯歲

拏魁堯咨為之接武子由以弱冠登第子瞻至於聯芳  
孫何齊孫僅之名宋初遜宋郊之榜韓家開闢吳氏簪  
纓皆一時兄弟之傑然乃我朝科目之盛者甲於江右  
未若廬陵名耀帖金以一門而五董筆香擅墨不十歲  
而七劉或踵接於童科或肩摩於胄監輝煌簡冊雜還  
衣冠至今文水仁山猶想流風遺俗雖巫步亦期似禹  
然賜賢何敢望回如棊者技等飛譏才長縮蚓故家喬  
木借秭歸舊峽之陰宦錄雲萍分白鷺餘波之潤勸皇

祐榜帖久寒石室青氈閱癸丑狀頭曾入本心墨譜恐  
負前人之弓冶勉為今日之箕裘有嚴君焉唾棄萬年  
之諂味難為弟者誓齊兩到之英聲故唯諾怡愉之間  
皆切磋琢磨之地晨憲花露滴乾硯眼之鵲夜帳木油  
剔盡案頭之蠹以孝弟忠信為實地以功名富貴為飄  
風非六六餘子之儔有飄飄凌雲之氣自染指時文之  
鼎即梯身季考之階愈出愈奇頗類黃絹外孫之藿白  
屢選屢中幾成翰林學士之葫蘆遂令伯氏吹埴仲氏

吹簾過辱庖人繼肉廩人繼粟方嗟雌伏未遂雄飛適  
槐粟之揉黃借棣華而拈采擲番骰子同拏喝六之籌  
彎起弓弦共上中紅之垛天開雙眼地放一頭渴睡漢  
平白解嘲揶揄鬼分明束首二旬賜第皆以沈內翰相  
期十八奏名僉謂劉學士可繼使小子自此升矣皆先  
生進而教之茲蓋恭遇某官秀孳天台英蜚帝學萬乘  
器可擎唐桂五色線要補舜裳器古壘於益益之中韻  
黃鍾於雜優之地一從分刺名雖沂郡之王祥兩屈護

麾實則潁川之黃霸斯民廣廈吾道泰山螺川醉多昔  
之春風燕寢樂近民之暇日政安赤子解弄挺之亂繩  
兵撫清人戢攘釵之橫彗雖借我二天之有幸恐尹京  
五日以趣還茲以題輿委之勸駕至若豆箕之朽質亦  
該花帖之榮恩是宜拂楮雪以牋誠候屏星而布謝誓  
當鞭策不負揄揚諒大賢何所不容知孺子尚或可教  
晉公得二俊才士不無汗赭於前修古靈薦三十餘人  
尚冀牙緋於後進

上倉守李愛梅謝解

執鞭而御於君風裁久欽司隸推轂而輦其正天人幸  
遇翰林欲借方寸地吐氣而言敢操盈尺紙循廊而進  
切謂烏河陽方司鎮鉞石生隨就禮羅王豫章未下使  
車荀爽已騰辟剡蓋人非卞和玉闕石竅而世無伯樂  
駒困鹽車必假先容乃梯後進切念某策非魯客材僅  
莊林自垂髫逮二十年知肄業為第一事家庭自為庠  
序要祖廬江興學之風文字懶傍門牆惟準石室立言

之法遙睇故家之木勉為良治之弓子玉應而父金春  
伯損唱而仲簾和夜梭剪燈帳幾成墨凍窻呵筆火不  
思爐每因染教於芹香屢獲聯輝於萼集角能戰蟻占  
序榜龜朋社陽秋過許洛中之陸鄉評月旦謂非吳下  
之蒙曩踏黃槐聊窺斑管合三萬餘於圍棘爭六十八  
之帖花如小子者車載斗量况有司之沙披石汰誰謂  
燭几駒窻之際遽蒙黃鍾罍洗之褒風健鶴披騰北海  
一雙之鶚雲橫鴈翅搏漆園九萬之鵬必侍郎瓊筆噓



而送之則進士虎榜自此升矣茲蓋共遇某官百梅風  
格八桂雲仍羅昭門兵甲於胸中漱淮水淵源於筆下  
風檣陣馬不足為勇長吉之文章景星鳳凰快覩爭先  
王濬之名望早躋顯第徧歷要途嘗膺北闕之詔綸出領  
西江之衣繡兒童猶誦君實野老皆識元城惟虎城舊  
治嘗屈典麾故螺水重來又新持節蘇疲民於恩露清  
奸吏於壺冰坐念鉛為銛跖為廉安有書如絲官如眊  
梁連檣粧執樂舊句重賡繒閱庫粟埋梁新謠繼作茲

屈皇華之使就延鳴鹿之賓某忝以釜箕玷茲玉笋敢  
不淬庖人之夙誓無荒陸氏之莊云云

賀吳丞相革

再登鉉路首冠鈞庭以進士為名臣兩朝倚重以儒宗  
為宰相四海具瞻天啓聖衷國有生氣某官洪濛而肅  
括光大而直方喬嶽泰山微細悉歸於涵育青天白日  
奴隸皆知其清明頃天子以為股肱舉海內望其風采  
霖雨未浹而收斂神功泰階未平而韜闕光耀共借温

公之歸洛猶期潞國之還朝偃逸藩維久鬱袞繡歸公  
之望均調鼎味復端鹽梅用汝之司公卿大夫交笏相  
慶兒童走卒舉手懽呼顧中外不謀同辭在古今未始  
多見斯人之望既切賢者之責方新維今言路之不通  
最為天下之大弊縉紳以開口為諱事城闕以游談為  
危機如人一家情睽離而衆悔起如人四體氣壅底而  
百病生多故之由一類諸此枰更子改柁轉舟移惟從  
衆謀可以合天心惟廣忠益可以布公道盡解羣疑衆

難之會克有榮名成功之休其惟我公望在今日某瞻  
依有素慕戀惟深適造闕以戒嚴聞揚庭而增抃以書  
上光範先伸賀厦之私於人見歐陽行展摠衣之敬其  
為懇切罔既敷宣

謝吳丞相

渙號揚庭方慶昭文之命蒙恩詣闕遠修進士之恭喜  
當風雲際會之秋得周天日照臨之下輒陳短淺爰叩  
高明伏念某才不逾人學未聞道雖家庭唯諾之教動

欲行其本心然山林朴野之資知無補於當世頃得備地官之貢遂及登天子之庭一第策名既有慚於負乘三年讀禮幾無意於驅馳宸命光華自天而下聖恩廣大如海斯涵遂令參京兆之謀仍許奉團司之表靖循僥冒端出庇存載冊戒行將下天威之拜彈冠稱慶遽傳公袞之歸重惟柳氏之碑曾辱燕公之筆讀聖主偏親之語佩教方新仰先生長者之風銘恩莫報矧復更新於弦轍自今密邇於鈞陶喜如其辭有莫能贊茲蓋

共遇某官兩朝舊德一代偉人金鼎調元曾接沂公之  
轍玉龍擎重再持忠憲之鈞屬逢當軸之初與有得與  
之慶某敢不勉摠素學圖報明時仰台宿之麗天既近  
輝光之照占赤雲而赴幕尚依覆燾之仁

先生之父革齋先生墓誌銘乃江古心撰履  
齋題蓋道體堂書

謝丞相

除祕書省  
正守日

竊祿叢祠方重素餐之媿備員蓬館遽叨黃紙之除由

大鈞之無垠故小子之有造輒攄短淺庸瀆高深伏念  
某大江以西一介之下幼蒙家庭之訓每欲行其本心  
長讀聖賢之書初何補於當世從事一研起身諸生偶  
遭際於聖明獲僥逾於科第君恩天大若為報稱之圖  
流俗波頽常有激昂之志當前年之赴闕適強冠之臨  
江親見主憂之時不勝臣辱之義陳師江潁悵無一障  
以宣勞奏疏公車倘冀九重之易聽奔命而歸田里舉  
目而盡干戈江迥川平非賴整頓乾坤之手糜沸雲擾

幾無戴履天地之身骨肉幸全於山林頂踵皆歸於造  
化琳宮香火揆始分而已逾石室詩書尋初心而未究  
敢圖菲采獲備茹連使當登崇俊良之時而秉校雙圖  
籍之筆賢人在內幸無正朋字之譏世運方平雅有讀  
祕書之暇顧茲甚寵非所宜蒙有懷負乘之慚無任循  
牆之懼使之得進退之正所以報知遇之隆茲蓋恭遇  
某官勲在王家澤被天下圭瓚鉅鬯侈名伯之來宣袞  
衣繡裳大周公之歸相既仗咎篚而定大難將興禮樂



而開太平遂使乾清坤夷之餘轉為小往大來之會至如公選亦及凡材某敢不勉企前修恪持素節彥博未至堂上已先蒙許國之知器之既入館中當不辱溫公之薦其為懇悃罔既敷陳

謝皮樞密龍茶

領香火於祠宮幸書下考校丹鉛於冊府誤玷中除由泰階六符之光為廣廈萬間之地輒裁牘記仰謝鈞慈切以登羣玉山夙號麒麟之勝持三寸筆將刊魚豕之

訛是為朝露之清班必極人材之公選我聞在昔公惟  
其人曷殊之學問楊億之文章仲淹之聲名器之之氣  
節苟非其類不在此科伏念某學不知方仕未能信尋  
千年之蠹簡早慕伊顏得一第之鵷梁終慚晁董深考  
國家之典每由館閣之途知負乘之懷慚恐顛濟之速  
咎故方筮仕已即丐祠尚口乃窮頗愛山深而林密觀  
頤自養徒羞月費以歲糜敢圖楓陛之疏恩俾處蘭臺  
而正字正恐不免耳其何以堪之靖循僥冒之由端出

陶成之辱茲蓋伏遇某官清朝良弼名世大才變贊化  
原大尊主庇民之道均調皇極普薦賢報國之心遂使  
疏庸與叨拔擢某敢不恪持素節勉企前修讀木天汗  
漫之書尚求指教陪丹地深嚴之幄何幸身親懇悃架  
深敷宣罔既

謝何樞密夢然

范質傳衣曾侈和公之遇仲淹入館復蒙元獻之知使  
諸公而與同升豈門生而不知報軫伸下悃庸叩中樞

伏念某石室孤寒青原落魄幼被家庭之訓頗欲得其  
本心長讀聖賢之書初無補於當世從事一研起身諸  
生偶持觚翰於南宮獲遇鑑衡於北面鸞鳳杞梓舉集  
權公之門款段駑駘誤登伯樂之廐名姓雖塵於函丈  
足迹未造於仞牆山斗之望彌久而彌穹畎畝之蹤愈  
踈而愈隔閉門自守知尚口之乃窮避世無求惟觀頤  
而自養凡竊祿奉祠之日皆省身念咎之時承明之虛  
著任之庭未嘗意想寂寞之濱寬閑之野遽拜寵光胡

為乎來哉是有其故矣想木天之清峻望丹地以凌兢  
顧非麒麟鸞鷲之英其如亥豕魯魚之謬深有慚於負  
乘敢自己於循牆茲蓋恭遇某官名世鉅公清朝良弼  
持樞贊化共調傳鼎之梅報國薦賢不種狄門之李遂  
令公選亦及凡材某敢不勉企前修恪持素節就中書  
而見座主將求一介之先容以進士而為名臣尚賴終  
身之保任

謝江樞密萬里

領祠宮之香火敢望彈冠掌冊苑之丹鉛誤蒙推轂薦  
非由於識面事真可以語人頂踵銜私額手奏記切以  
觀遠臣以所主孟子以言進退之閑遇大賢而相知韓  
公以為遭逢之盛蓋受恩非天下之所少而知已得君  
子之為難乃若初無左右之先容獨受門牆之隆遇以  
古道之相與尤人生之至榮伏念某才不逾人學未聞  
道雖家庭疇昔之教動欲行其本心然山林朴野之資  
知無補於當世執經而後承恩以來念景行在四海之

達尊而科第非終身之能事頗欲自拔於常人之類庶  
幾無負於上帝之衷頃趨闕下之時適際江干之警主  
憂臣辱念我生之不時外阻內訌繫禍至之無日因撫  
躬而思奮遂投匭而獻言當時破腦而剗心何啻隻頭  
而爛額有倉卒等死之慮無毫髮近名之心六太息之  
陳豈曰賈生少年之過三十字之獻幸寬郇模東市之  
誅逮時事之既平滋人言之無據小體者戚其失措好  
事者高其得名痛痒無知者以文采為賢操挾不正者

以諱競為議匪躬之故俱莫諒於初心尚口乃窮嗟難  
行於直道既奉祠而竊祿額閉門而讀書未可與俗人  
言姑盡吾分內事不謂見知於長者遂勤延譽於諸公  
承明之廬著作之庭未嘗夢想寂寞之濱寬閑之野遽  
沐寵光非華袞有一字之褒何弊帚增千金之重雖深  
慚於負乘然幸出於鈞陶永堅乃心欲報之德茲蓋伏  
遇某官清朝碩輔昭代真儒胸中括石渠東觀之藏海  
內仰天球河圖之瑞睠惟世道深屬我公整頓乾坤共



屹江流之柱獻納日月入旋斗極之樞非徒耀不世之  
功名將有意太平之禮樂凡今小往大來之會多出前  
推後輓之功遂使踈庸例叨拔擢某敢不力持素節勉  
企前修稱彥博於都堂幸借郇公之譽薦仲淹於館職  
敢忘元獻之知

賀江左相

大老造朝元台正席歸公有袞繡我來自東用汝作鹽  
梅王置諸左三台明概八表清夷洪惟我朝相業之隆

莫如元祐家法之懿潞公平章軍國司馬實位昭文正  
獻議論廟堂微仲嘗升左轄或以學術真純而輔君德  
或以人物直諒而當帝心續遺響於先秦兩漢之前文  
章鉅麗挺雄姿於黃河秦山之上器量崇深此自古之  
難兼蓋于今而獨見共惟某官行關百聖名塞兩間于  
前寧人期之以伊尹傳說今從學者尊之如韓愈孟軻  
尚論公之平生有報國之大節以君子不用為我恥以  
小人未退為己憂童兒婦女知其血忱搢紳大夫想其

風采自其驅馳外服出入中朝洛中偃仰之年江上經營之日以至贊先皇之大政參嗣聖之初元賢與不賢一言定其可否用或弗用四海視以重輕卓然一時人望之宗展也三代王佐之事屬登庸之伊始問夢卜以孰賢朕安得斯人哉固無踰老臣者乃申帝指乃穆師言金既覆崔相之名銀信趣鄴侯之覲朝士舉笏相賀都民遮道聚觀天子引見以勞歸東朝出饌以錫宴遂由政路徑秉國鈞先天下而憂斯能後天下而樂有聖

人之任將以行聖人之時莫難得者海內相望之深最罕遇者君子氣類之合方今師維尚父右舉皋陶贊襄於都俞之間寅協於和同之際鈞無垠而播物相天地理陰陽鼎有足於承君安國家定社稷昔講於洙泗者困道路之厄而學於河汾者抱禮樂之慚道之行歟時則可矣俾我后五三之盛真吾儒千一之榮某猥在山棲欣逢庭冊親見上下龍雲之會豈從門闌燕雀之私陽翟歸耕回首舊時之學士徂徠作頌傾心今日之太

平慶抃情深刊摩語淺

馬右相庭鸞

號碧梧

紫宸播告金鉉登崇歸周公於東方來大老舉皋陶於  
右復得良臣九鼎尊安三靈開懌自馬服君之著姓至  
伏波氏之封侯燧進侍中特超居於外府璘還僕射姑  
借重於將壇惟賓王起自書生在貞觀號為真宰然以  
草茅之踈遠出於羈旅之遭逢未有親拔巍科素居清  
望布衣之極以一編為帝師都門之中不十年至相位

於皇盛舉夔掩前聞共惟某官得聖人之和抱王佐之  
學高山蓄泄有潤澤萬物之功太極渾涵無運用四時  
之迹自顓昴措紳之日已雍容廟堂之風告后惟良有  
謀猷則順于外敬王如我非仁義不陳於前其出處不  
可瑕疵其喜怒未嘗形色龍潛羽翼栽培不世之風雲  
鼇禁絲綸醞釀後來之魚水先帝留之為宰輔之備主  
上待之以師傅之尊徑邁羣公徧登兩社或主東聽之  
典故或參西事之經營鄴侯之跡大奇安石之名愈重

兩宮明聖一老辯章既峻昭文之迂遂正集賢之拜朝  
家用元祐之故事學館獻慶厯之頌詩儒者之過僅有  
而絕無天下之望方來而未已簡淡獨周於事物晦叔  
所以有立於潞國司馬之間忠恕不離於須臾堯夫所  
以無媿於正獻微仲之際前哲之風流未遠太平之幾  
會有開宣特輝簡冊於二百年之前直將植風聲於千  
萬世之下某喜傳鴉字驚起牛衣知廊廟之有人為國  
家而增氣昔通政府無書或詭於門人今誦相麻交賀

敢遲於朝士其為拊蹈罔既刊摩

通章簽書鑑

號枕山

茲者共審渙號明廷晉籌宥府風生黃道衛宸殿之凝  
嚴星度紫清煥斗杓之赫奕真儒無敵中國有人竊惟  
我朝之盛明最繫君子之翕合永叔之參兵柄在魏國  
位平章之時堯夫之贊樞庭當潞公判重事之日于以  
笙磬治平之政于以塤篪元祐之功若稽前聞復見今  
日共惟某官知周而道遠仁熟而義精和風甘雨慶雲



備四時之正氣高山深林鉅谷名一代之魁人當屬者  
為小官之初已淵乎有大臣之器誰起諸國人之謗我  
衣而褶之我田而伍之公真大丈夫所為匪席可卷也  
匪石可轉也突兀南都之鐵壁卷舒滕閣之朱簾在江  
湖在朝廷時人望其大用為臺諫為侍從識者恨其已  
遲六飛之馬莊重而不馳萬斛之舟舒徐而後進厥今  
天助順而人助信大在廷而細在邊江漢沔水朝宗載  
揚我武夙夜基命宥密無競維人遂升兩社之班爰贊

五兵之本宰相計安宗社太師時游廟堂參之以運籌  
帷幄之神輔之以折衝樽俎之密衣冠盛事具四方巖  
石之瞻衮烏一堂有三公鼎足之勢適觀大業丕建隆  
平某盥耳山棲傾心廷播親見天地雲龍之會非為門  
闌燕雀之私傳江兩宗派之圖敢云入社誦徂徠聖德  
之句請繼作歌扞蹈之深敷藻則淺

賀倉守趙編修端齋

侯藩課最庚節陞華常平專斂散之功廉察展澄清之

志有識交頌不謀同辭共惟某官璿派清流玉班雅望  
早贊樞庭之畫過躋府寺之崇結知前旒試庸外服幸  
甚趙大夫之日來臨歐六一之御廟堂知其為循良田  
野誦其為豈弟二天不啻兩年于茲雖明公屢上丐閑  
之章而天子正深倚重之眷爰畀茶鹽之任聿增麾節  
之光鮮于一道福星式快輿情之望晉公三司真使行  
膺御札之除某仰席庇休倍深欣抃大厦成而燕賀敢  
修奏記之恭六轡沃而駟馳實切執鞭之戀其為贊慶

罔既敷宣

回瑞州羅權府

遙瞻松雪久羨檠水簾捲西山撫輿圖於錦水書移東  
里醒午枕於桐鄉寵委新編輝生棄弁天高地迥諒碧  
落之知心日光月華看紫微之潤色謝私何限嗣敬以

陳

回吉州繆守送端午

端午賜衣漸傳壘召昌陽薦俎忽沐珍頒行人責然來

思野老為之驚見某官心清於水仁行如春岐麥詠漁  
陽方騰善政角黍記荆楚尚念流風亦分百索之餘遠  
及一厘之陋某條驚晚良感慙勤剪綵艾以為嬉強  
酌佳節對燈花而作報多謝故人

回朱約山賀生日

鄉有達尊獲在嫡孫之行我生初度誤蒙大老之知庭  
實駢羅使華驚見共惟某官世間活佛天上壽星棄萬  
戶如張子房而壽考遠甚領諸孫似郭中令而精神過

之尚憐蒲柳之新姿分以松椿之餘福既受賜矣細吟  
香山三十六之詩何以報之還祝崆同千二百之壽

餽朱約山歲禮

歲無多子驚爆竹之條來盤有五辛喜屠蘇之未至暎  
時大老萃止繁禧喧榼馬散林鴉遠傳歲頌臥籠兔橫  
盤鯉聊見鄉風

回前人餽歲

一壑棲遲不覺歲年之晚五雲飛墜頓生草木之春分

四老之玉塵起初平之白石某官陽和著物壽極當霄  
門有垂車換桃符之新句庭多戲綵沸竹爆之驩聲猶  
推椒柏之芳馨散作茅茨之光寵某肅登嘉貺祇佩盛  
心嘆巷北之擲揄吾癡未醒祝樽前之強健翁醉何妨

回前人賀生日

富公七十九歲嗟九老之不如潘岳三十二年覺二毛  
之已見方揆余之初度忽惠我以好音疇昔折輩行之  
謙從今悅親戚之話永為好也長歌白雪之章還以事

之願壽青山之約

回彭知縣賀生日

潘岳閑居已覺二毛之見盧仝破屋忽驚三印之來愛  
之欲生錫以難老親戚情話若是綢繆宇宙吾生不勝  
感慨矧復贈我永言好之讀三星行誰解嘲於南斗壽  
八百歲尚徼福於彭城

回太和趙宰賀生日

三載淵明幸相望於五柳今年潘岳覺已見於二毛懷



哉好音賀我初度愛之欲其生也忠焉能勿誨乎一鶴  
自隨約青山於未老双鳧何許感流水之相知

回太和趙尉賀生日

潘岳閑居已覺二毛之見盧仝破屋忽驚三印之來為  
此大小年之光異哉神仙尉之寵錫以難老愛之欲生  
陽春白雪之詞真成寡和流水高山之約安得相逢

回胡宣教賀生日

春華如水驚三紀之流光夏綠滿園又一年之初度方

拾薪而煮瀑拈撷草以供茶敢意虛谷有來庭實錫之  
厨珍以起其牢落將之篚厚以申其慤勤門外桑弧自  
歎男兒之老里中羊酒敢忘親戚之情

回蕭子蒼賀造居

杜門掃軌方尋歸隱之盟依山結廬聊作奉親之計正  
辛勤於結構辱折寄於芳馨室虛分垧北之春庭實委  
續紛之既想兒郎之歡喜共舉草堂謝介使之勤渠寄

將梅驛

賀朱太傅得祠

楓陛疏榮蒞宮領秩平分風月暫橫綠水之舟寄傲烟霞新入壺天之宇相羊得所進退有階共惟某官一世精英盛年華要春風滿座人知公揆之懷雲谷讀書我得晦翁之樂聞已速夔龍之武未容高鴻鵠之飛某同志有人相期何許臥貧營谷正尋白水之盟望麻姑山輒致黃冠之賀

送韋主簿成功赴宏詞科

徑辭矮屋前赴大科開五十難以試教官是名上等分  
十二體以取詞學尤見宏材慶熊魚之得兼觀龍象之  
第一某冬烘白昔晚歲相期久此妙音不到蓬宮之處  
看君名第又光杏苑之年

回廬陵趙簿投贄

我輩蓬蒿正堪羅雀美人錦綉上有棲鸞懷哉六謙持  
此三過某官鳳其翩翩麟兮振振吹大乙之烟藜歛然  
特起織天孫之雲錦燧乎相輝有是簿耶自此升矣某

細鼓白石遙想綠縈看南山之雲惠而好我穿東郭之履欲往從之

回吉州陳守緯

台州人葉西澗表親大常丞

分牧龍藩此非子坐退耕鶴隴乃得公書紛六轡之光華亶一廛之榮寵某官照人白雪有脚陽春蒙福凡十萬家民歌載路薦人至二千石相譜滿門籍甚噓枯居然起廢某豈堪作吏真足為氓儻一壑之無他維五雲之在上吟詩自樂退求元亮之心設榻相看徒感陳蕃

之意稟酌不敏摧謝未央

賀前人除福建倉

藩條報政庾節敷綸雲閣森嚴上接神奎之府天因明  
概下臨須女之虛天啓九遷民爭二竟共惟某官渾金  
璞玉甘雨祥風家有旂常籍甚東山之名姪身雖朱紫  
依然太學之儒生蚤騰駿馬於雲霄遂主神螺之風月  
人懷惠政帝有恩言奪南國之二天遺東甌之一佛常  
平典在武夷之文獻可尋宰相時來文穆之聲猷孔邇

某退耕滕野喜趣曹裝輒持行李之恭庸展塗芝之慶  
事大夫賢者庶自附於攀轅以我公歸兮將不勝其賀  
厦其為頌抃曷竟敷陳

賀劉省元夢薦登科

辛未省元甲科  
第九人衝教

蘭宮拔穎甲第傳臚過千曰俊過萬曰英人間健筆第  
一為魁第九為弼斗北修名柯峰翠濕於飛纓泮水清  
搖於振鐸行撤皋比之席即歸鷺翽之班某正僻耕寬  
遂稽箋賀賦雲山之紅樹焉得往從摩石室之蒼苔不

堪持贈

迎寧國交代孟知府

共審肅將一札言收雙溪紫馬西來照旌旗而出色玉  
麟外遣覺篆籀之生輝上日先庚懽聲旁午竊深慶抃  
欽以某官羔裘豹裒玉質金相說書而動京師素積行  
祕書之學把麾而去江海重為賢刺史之勞少稽漢郡  
之三公嘉惠建州之千里某久哉望歲際此行春宛水  
明樓已敬虛於中舍昭亭簇騎敢先候於前茅謹具申



聞伏惟丙照

除湖南憲道交代李樓峰

李改  
除漕

東風一道喜鵲錦之生花元日十行愧牛衣之換繡幸  
甚葵丘之新好託於杏苑之舊盟一介施先七襄敢後  
共惟某官負宇宙之志出文獻之傳高山深林世載其  
魁傑青天白日人知其清明地望接乎西平聲名垂於  
北斗瑶編玉牒參天上之神仙紫界粉牆隔人間之風  
雨盍鳴珮而登馭娑乃弭節而下控同民五袴而牛瀆

滿家米萬檣而蠶桑遍野屬凝旒之西顧遂持斧以湘  
行風動褰帷祝融七十二峯之雲曉星沉貫索太微二  
十五宿之芒寒江春洗蘄莊之愁庭晝臥桁楊之影方  
山搖而岳動俄斗轉而星移五大原之流馬木牛運於  
樽俎八景畫之晚鐘沙鴈同是江山我公之二界無爭  
先君之四封如舊然而江濤如許原隰謂何温公嘆子  
駿之福星不宜居外文正服張公之大體引以歸朝爰  
重中權式光前軌某生而骯髒分也嶽崎飲蘭露餐菊

英哺烏有味裂荷衣焚艾製夢鹿何心每為梁甫之吟  
有感長沙之賦曩於飛輓徒觸危機今見平郊猶驚曲  
木賴有同年之宿昔互為一日之交承春為秋先秋為  
春後甲入乙舍乙入甲家曲江會上之風流南岳雲邊  
之禮樂荆俗相傳於佳話蕭規幸淑於前猷睇駟駱之  
光華敢云並駕隨雲龍而上下儻許執鞭欣蹈之私誦  
言莫既

賀前人改除湖北漕兼知鄂州

日陞揚綸冰輅作屏北斗丹梯勾陳玉檻聯郎宿於天  
階渚宮碧樹巫峽青山迎福星於江夏光稠符玉色動  
轡絲共惟某官鐵馬行空金虬驚海離離珠璧府懸黎  
垂棘之光耿耿斗牛虛干將莫邪之氣洒翠竹碧梧之  
韻度發清霜紫電之神竒太微二十五星旌搖江漢祝  
融九千餘丈節倚雲霄當驅馳吟遣使之詩每慷慨讀  
出師之表落落襄樊之事會悠悠江漢之風寒局面一  
新機神頓聳師垣制勝集忠益而開誠心帥閫請行從

便宜而上方畧武承先志孰與明公乃峻冰臺乃陞寶  
皮練鵲錦之廉車改觀黃鶴樓之衛戟生風餉高密之  
師借恂河內詔西平之子贊度淮堧節鉞合而氣勢張  
弓矛重而精神壯北伐歌功于六月中興刻頌於萬年  
樓船過洞庭旌旗直下閩闔開黃道袞舄遙歸某方協  
寅衷喜傳卯詔界上爭杜衍想共戴於我公方面待乖  
崖將遂誇於吾榜行行會弁疊疊賀牀

賀前人生日

暢月先春福星初度朱綬錦艾聯赤壁之六絲蓬矢素  
弧絢紫微之五色玉書吐燄繡紱生輝共惟某官風骨  
清剛精神大耐仙人駕黃鶴色照渚宮老子跨青牛氣  
浮函谷壽八荒而裒福律九寸以迎長崇陰照岫嶺之  
央十分翠曉桃影近蓬萊之水一朵紅雲其夙分碧落  
之香遠認瑤池之色一車以南一車以北軫軫相望千  
歲為春千歲為秋心心持壽

賀化池冬

舞雲門而奏至六琯函和占星壁之正中三階齊色芝  
香丹禁穀介黃扉共惟某官心見乾坤身扶元會御牀  
親捧耀五龍夾日之光寶鼎密調胚萬象皆春之意燦  
火城之鶴燄領圭烏於駕行宜袞袞之北之和茂集陶鈞  
之福一陽出地露玉燭之光芒五色書天開金穰之瑞  
慶某叨繼乘輅之乏殊慚把繡之長絢色線於帝寰乃  
心上袞跂黃雲於仙鞮莫尾賀綦頌詠情深敷茶喙短

賀化地正

帝堯授歷肇開平秩之端周公為師實主泰和之運光  
華絕席埭北方維共惟某官玉燭際蟠鈞陶動植調元  
神鼎心包太極之春捧日扶桑色照蒼精之角條鬯東  
南之溫厚埴簾上下之明良拜晉國大夫人慶祥符之  
真宰邁路公平章事登元祐之昌期億載敬休八荒開  
壽基固身洪播稽首獨班三陽君子泰來仰贊茹茅之  
盛四牡王事靡盬俯同苞杞之生致賀輪囷戩枕稿秸

賀簽書冬



晷躔南陸一線迎長星麗西樞三階齊色袞時茨祉穀  
我英髦共惟某官元會運之經綸天地心之橐籥黃雲  
乘轡肅劔履於大昕繡日補裳領衣冠於亞歲鼓舞黃  
鍾之雅陶鎔緹幔之溫萬物生輝回餘光於草木八荒  
開壽邕新渥於乾坤某承乏湘軺馳瞻魯觀芸香透暖  
尚憐采苦之寒梅意先春預闔和羹之候葵葵是祝草  
草奚殫

賀參政正

簽書樞  
密院兼

東角耀芒開三朝之景運西樞齊色轉萬象之洪鈞碩  
輔均弘方輿錫羨共惟某官明謨贊化熙績亮天金鼎  
調元共幹太和之運玉衡測影首參平秩之功塤麓宥  
密之經綸鼓舞明良之際會薇歌中國壽細柳之春風  
花滿上林揭扶乘之曉日四方來賀三壽作朋某身逖  
馳驅神傾坳圯拔茅蓮茹言觀君子之風集杞方苞尚  
念使臣之遠輸困致頌藁結箋忱

文山集卷九

欽定四庫全書

文山集卷十

宋 文天祥 撰

啓駢劄子

賀江丞相除湖南安撫大使判潭州

舊弼起家价藩建閩姬公相周而為左方遂明農召保  
分陝而守西又新維翰威行夷夏運在東南恭惟某官  
壽俊兩朝禮樂四代修名偉節以日月為明泰山為高

與學精言為天地立心生民立命水火不爭於鼎鼐泥  
金各就於陶鈞本之身心暴秋陽而濯江漢措諸事業  
膺戎狄而懲荆舒起觀一世之安危端繫大人之出處  
當世道未寧之日正遼人相戒之時乃放一道之玉麟  
乃授三公之金鵲謂捍荆門吞夏汭寄莫重於星沙豈  
挹浮丘拍洪崖間可專於綠野安石起東山而符秦潰  
孔明渡瀘水而孟獲擒維茲銀濤青壁之雄倚我錦艾  
朱紱之重功隱存於宗社書不盡於旂常三軍百姓之

歡迎天開玉帳一馬二童之促召再築沙堤佐興唐虞  
誕保文武某及門甚晚知己何深薦不識面官每嘆先  
生之古道自號報恩子豈在衆人之下風鳳凰出而羽  
毛朝蛟龍驤而雲氣族一日偃繙之際會同時誤節之  
走趨方當聖哲馳驚之秋無限師友從游之感孝子回  
車忠臣叱馭將交盡於君親司空副相太保上公惟深  
期於造化潔蠲拜下傾倒由中

賀前人除特進

碩輔在藩優恩加秩撫淳熙左相之舊鎮赫奕十連冠  
元豐特進之新銜巍峩一品星馳汗號雷動驩音恭  
惟某官者壽具瞻宗師先覺東問典故西問文學錦堂  
丞相之規模公見庶僚府見監司潞國太師之度量維  
時台宿來茨軫邦熊當道而貉子之瞻寒龍居淵而象  
罔之迹遠上思舊德時有思言進左右僕射之官增詩  
書元帥之重在師中吉承天寵也既都錫命之榮以我  
公歸有袞衣兮即轉征東之馭某猥塵馳轡阻赴賀牀

戴鄴淥之清指玉麟而為壽  
遡斗樞之紫綏金鵲於方  
來

回前人除特進送禮

上公國輔相望龜紱之華  
特進天人忽枉鸞飛之字  
溥  
乾坤之新渥賁岫嶠之行  
雲庭實熒煌鈞和垓北芳  
洲  
杜若被紫駝翠金之榮驛  
路梅花看赤烏繡裳之觀  
熏  
香跪謝伏繭沂馳

行部潭州謝江丞宴



古之學必有師甫趨函丈子使人歌而善肅拜初筵春  
風渭北之旗夜月洞庭之樂簫韶俗身冰雪征塵車攻  
賡六月之詩先聞吉語帝所聽九成之奏再相太平

送前人九日禮

宴龍山九九之節夙侈雄藩開鶴林七七之花今逢真  
宰風清六纛霜肅九州恭惟某官赤烏元圭瑠戈錫盾  
酌長沙酒快春水之曉行賦北門詩喜秋花之晚看小  
馳戲馬重補袞龍某記影星垣驚心颺館跂芙蓉之頂

想千乘之登高折茱萸之房為三公而持壽

回前人送九日禮

天開紫蓋秋高淡圃之香星下碧泉春到長沙之酒飛  
卷五雲之風雨光華九日之山川味也深深恩斯曷稱  
北門看菊幸與分玉帳之清內殿傳柑聞已下金甌之  
信

賀前人冬

春入重緹欣聽雷蕩之奏台明上袞具瞻井鉞之輝穀

我麗臣哀時疇社恭惟某官量包元氣心見先天冠漢  
殿之仙班火城如畫補舜裳之五色宮線猶香卷舒昭  
文館之春風布護祝融峰之曉露蒞蘭出色芸荔含和  
愛日迎長開一氣八荒之壽瑞雲促覲領五更三點之  
朝某迹固轉鈞心馳獻履近依星軫愧直指之綉衣遥  
贊陰門歸碩膚之赤舄薄言燕賀永矢螽鳴

送前人折筵

肇九寸律柄屬洪鈞建十丈旗光生几烏馳想雲和之

瑟莫陪壽軫之觴薄注鄙清式歌魯瑞出乘仙鞮遙修  
南至之恭入捧御牀預致東歸之慶瀆巖增惕錫頓為  
榮

回前人送冬酒

噓嶰谷之陽方覃鈞播照霽湖之渌忽拜袞題有華舞  
袖之春風增賁繡絲之曉日淺深存變理滿傾北斗之  
天漿德澤布光輝跪沐南山之雲氣輪囷鏤感稟結刊  
申

賀前人正

龍杓麗曉天開泰內之陽驛騎明春星起軫中之壽和  
薰青瑄喜動黃麻恭惟某官心會陽宗身扶人統散明  
帝袞迎瑞日於東郊繅煥公圭照蒼精於左角卷劔氣  
玉烟之彩增繡裳赤舄之榮東作有三百六旬陶鈞一  
轉中書歷二十四考鼎鼐重新戒前路之鸞鳳沸歡聲  
於童馬某喜逢雞朔隄贊熊旂光近火城又獻大椿之  
歲寒噓雲舍敢忘寸草之春歧賀心馳箋忱喙短

送前人酒

開條風於獻節瑞藹三朝介壽酒於公堂春生四履斂  
神光於雲岳拓喜氣於沙堤輒持鄙渌之窪樽聊贊鈞  
天之和鼎不匱錫爾類懷哉萱草之詩再入福蒼生如  
此椒花之頌薄將凌躡賜頤欣榮

回前人送春

春回太簇開雲氣於南山曉醉長沙酌天漿於北斗挹  
注偏提之閨薰蒸統部之和綠淨生香洪鈞轉煥八仙

池隅莫陪左相之杯太乙風生諭贊東皇之席卷卷跂  
謝草草箋忱

賀前人赴召

銀信騰霄金書照闕映南雲之紫蓋春滿江湖歸東雨  
之袞衣天開闔闔行宮絡繹統部歡呼共惟某官以大  
宗師為真宰相文章若雷霆河漢玉色金聲言行質天  
地鬼神丹心白髮出納祝融峯之日月卷舒昭文館之  
星辰北門小煩魏公盡寬上顧中國再相司馬坐懾衆

心仙人駕綵鳳以傳音老子馭青牛而入觀碧涵汀芷  
曉清沙路之塵黃把庭麻夜轉火城之影某園身化治  
舞手揚綸大老盍歸乎來共致巖瞻之喜君子永錫爾  
類終徽鈞播之私跂賀欲飛牋詞甚粘

通羅提舉京字

號牧  
隱

天困照楚瞻駟轡之濡絲雨耒耕綿愧牛衣之易繡合  
臺容之永好嚴牘贄之先恭欽惟某官冰浸玉淵雲崢  
鐵壁沮金石諧韶濩音振蓬萊踞虎豹登虬龍氣摩岫



樓覽德輝翔千仞而下迴狂瀾障百川而東萬鍾何加  
一介不取寧航選海掉頭不揖於王公使夢鈞天平步  
可登於卿相莫屈英英之氣何求赫赫之名以恢乎玉  
山壁府之才亦屑於金署犀監之屬再命而俯一車以  
南霜飛暑路旗展春山輝煌周隰金聲中朝玉振江左  
照映熊湘起視西北之風濤誰是東南之砥柱必平居  
曰法家曰佛士則臨事為孝子為忠臣參文公之政於  
浙西舉行殆遍凜清獻之風於殿上植立方來某政酣

吸菽之甘不作覆蕉之夢長鏡為命忽持斧以重來曲  
木猶驚雖循牆而莫避幸甚星臺之近聿為鄰燭之輝  
繼自今為王事之圖增昔者寘周行之氣九折回王尊  
之馭為軛馳驅四方隨東野之龍願從鞭弭匪伊拜下  
莫既由中

回前人手批書

舊例監  
司文

疇庸天庾趣駕星闈戒嚴繫日月之書茂對照乾坤之  
渥某稟承有恪占署知榮謹具劄子復申稟結萬愧

送前人七夕

瞻兩旗之耀獨立秋風依六轡之光相望七夕來繡口  
錦心之巧贈玉盤金錯之英鄰酒春深客堂涼透牽牛  
織女看夜度於天街語燕留人且曉吟於湘水

請前人宴

濯錦湘江欣覩乾坤之渥卷簾楚觀頗懷風月之談忘  
蒙瀆之為嫌冀謙尊之肯訪薄言卜日為慶朝天富以  
其鄰且細論於尊酒德將無醉願小駐於鋒車某輒擬

翌日敬邀崇重

回前人折送

錦闌星度喜，渙禁綸畫舫雲來特，開臺宴為折瀟川之  
淥頓生楚觀之春，酌郎官清卷碧筩而遙謝懷美人贈  
慚荆壁之無酬

請前人九日宴

紅杏舊陰甫，迓天囷之綠黃花佳節，又飛冰篆之丹青  
車已動於行雲流馬，聿來於今雨偶龜，明日薄宴清風

莫置錦屠蘇且拚小飲已鑄黃金印行慶異除

送前人折筵

鵠立春霄帥雲霓而來御鴈拖秋色喜風月之共談欲  
挹注於黃流盍招呼於綠淨踈效折枝之瀆想為會節  
之煩飲露供騷何取水中之薜荔倚雲同味共看江上  
之芙蓉

通董提舉楷

號克齋永嘉  
人前知瑞州

魏闕揚綸熊湘授庾刺史二千石雲度錦河天國十三

星春浮絲隰六條先曉一道生風恭惟某官閎冠雲霄  
樓高湖海沮金石諧韶護音振蓬萊踞虎豹登虬龍氣  
摩鴈蕩清泚二蘇之潁水崢嶸二陸之象山自崑丘鳳  
穴之鳴陽即溟海鵬雲之增翮上下浙江之明月早透  
金闈翱翔輦路之春風曉聽魚鱗灑灑清都之人物飄  
飄碧落之神仙張乖崖斬叛卒於益州騷動之餘富鄭  
公活飢民於青山荒殘之後璽書選表環召歸班大府  
上士之清聯帝思前席常平使者之新轡公念南湘以

醴泉芝草之春為芳芷杜蘅之澤九郡顛顛而望賜四  
壯業業以戒嚴霜飛暑路旗展春山已搖翠岳烟傍袞  
龍日臨仙掌遙侍紅雲某夙出年盟今諧鄰好萬里風  
雲之天潤一襟草木之味同祝融山外之芙蓉肅迎紫  
氣泰華峰頭之冰雪佇沐清風

回前人到狀

夙綴鴈題今聯駱轡欽僕清風之戾止並馳新雨以恭  
先甫快低簷居廬飛翰天困星近喜不隔於光華湘水

月明尚嗣承於談笑

迎前人

星槎度漢天庾明湘丹鳳銜書光照朱維之色蒼龍授  
節清搖綠淨之波禮樂輝煌旒倪鼓舞恭惟某官文章  
大雅節概真清玉立九關徹芒寒於霄漢春行千里蓄  
精銳於雷霆屢培後戶之本根少屈廉車之步武任一  
道常平之寄推九重博濟之仁不待突黔趣歸橐紫某  
寅同下隰蔭接芳隣太史新占看德星之照軫故人舊



識喜今雨之來車

送前人洗拂

振衣碧落弭節朱陵祝融驅海若藏江山搖動風伯清  
雨師洒原隰昭蘇言解征驂驩傳回鴈某年盟有夙鄰  
蔭方新吉日來思已慶拂龜之喜皇華近止輒陳秣馬  
之恭

回前人送私覲

今雨來車方連雲於回雁清風落袖忽分貺於懸魚捧

旅實以若驚恍使華之如對報青玉案頗懷客况之寒  
望黃金臺惟謝年情之厚

謝前人招宴樂語

雲垂臺蔭偶陪湘水之行風度伶音恍聽洞庭之奏和  
氣一堂之律呂年情四海之弟兄矧燕花飛舞之時正  
鵲錦交輝之旦充庭有喜滿座為春故永歌之尚想五  
章之禮樂式相好矣永懷一片之宮商

送前人新除禮

峰回秋色霽誰留兮中洲臺立春水歷余征於吉日鳥  
奕車輿之彩葳蕤袍鵲之花注綠淨以傾馳晚青空而  
折寄洞庭霜熟是為正好景之時閭闔雲開嗣貢真福  
星之賀薄言卷俎莫究衷旌

送前人折俎

臺冰正色錦袍生春馳華轡之六絲軫星增煥鑄黃金  
之一節融岳如新條令具孚耄倪胥抃某阻奉即真之  
賀輒修攝飲之恭禮無體樂無聲慙懃直寄南有箕北

有斗清淺相望持瀆志志麾留荷荷

回前人中秋請宴

照江疊節載畫舫之清水待月舉杯呼芳樽於綠淨拜  
華星之墜几約明月之浮槎風雨滿城何幸兩重陽之  
近江山如畫尚從前赤壁之遊橐括申酬輪囷嗣布

回前人折俎

注鄴湖之淥昉慶臺春然楚竹之清倍分鄰燭載塵卷  
俎如侍秩邊援北斗以酌天漿既知賜矣醉長沙而行

湘水悵莫從之

回前人送酒

福星明處甫羞北斗之漿今雨來時又報長沙之酒起  
立寒梅之月影坐添凍芋之春萌雖軫軫之相望真心  
心之不隔白絹之封三印報不成章黃麻之似六經又  
將來賀

賀前人冬

春入重綰欣聽雷鼓之奏星垂練錦沂瞻沙軫之輝履

此一陽賁然雙節恭惟某官聲名震動意度春融大雅  
正音得黃鍾之渾厚純和元氣探寶鼎之絢縕卷夜月  
於蓬萊布曉雲於岫嶁蒞蘭出色芸荔生香君子得輿  
開千載一時之會使臣濡轡催五更三點之朝某斧鑿  
何功臺雲借蔭暖回鄰壁先鳴鳳之六筩光近福躔會  
牽牛之七曜通志喙短馳賀心長

又送冬至酒

五紋添繡線日麗旌旗一節鑄黃金春生霄漢馳想雲

和之瑟莫陪壽軫之觴薄注酈清式歌魯瑞九疑仙人  
之鞮正快曉行四牡使臣之車即催元會瀆嚴增惕賜  
頓為榮

送前人歲節酒

條風開獻節瑄玉更端春酒躋公堂壺冰薦祉皇華六  
轡和氣九州輒蠲杜若之清持向屠蘇之未軫中星轉  
踰瞻練鵲之輝緜上雲歸為喚林烏之夢薄將增慙賜  
頓知榮

賀前人正

龍杓曉轉天開泰內之陽駟轡春行星揭軫中之壽雙  
旌郁穆疊節焜煌恭惟某官清澈壺冰和鍾琯玉葱珩  
剡剡輝瑞日於東郊練錦煌煌映蒼精於左角小駐祝  
融峯之雨露遙催含光殿之風雲某幸接臺容欣周律  
暖酌屠蘇酒願均八荒壽之心詠萱草詩曷謝三春暉  
之賜傾心來賀引領欲馳

回前人送春



杓攜龍角煥天上之星辰壽介兕觥分軫中之和氣喚  
醒年華之舊移來夜酌之春折芳芷與杜蘅永懷騷雅  
按紫藟坐碧草隄企湘深什襲知榮七襄莫報

得贛送前人禮

上堂拜家慶偶忝近麾痛飲讀離騷有懷疊節持此清  
泠之寒淥進于沆瀣之朝霞望美人兮一方特慚絕禮  
問征夫以前路尚肅藥規輜瀆有慚麾留斯寵

回前人請宴

堂有白髮親誤塵便組公鑄黃金印為舉初筵移來長  
沙酒之芬馨喚起章貢臺之顏色君子永錫爾類已懷  
既醉之歌使臣言遠有光尚借如濡之潤

送前人別會折俎

楚節易麾深味慈烏之哺湘花舞席踰瞻練鵲之輝思  
君渥之綢繆膏吾車而繼縷上堂拜家慶遠借光華痛  
飲讀離騷踰同慷慨區區折寄盼盼麾留

回前人別會送酒俎

回邛坂之車方隨檣燕贈蒲城之酒忽枉帳犀慙懃折  
柳之情流麗飛花之影丈夫豈無別淚不洒於東西同  
年亦有情雲相隨於上下銘感媿媿馳泝泆泆

小人有母聊分竹以懷歸君子錫朋指飛花而賦別慷  
慨執祛之意慙勤祖帳之文卷倚良稠銘感不足日暮  
碧雲合喚游子於他鄉月明今霄多耿美人於河漢

揭麗軫之福星逾詹正色呼歸航之明月尚沐餘光雖  
已催南浦之春更為醉長沙之曉公方行冀部即聯獻

納之班吾亦念桐鄉終席澄清之潤懷哉折寄罪甚刊

酉州

賀衡州宋吏部赴上

鳳池絢曉鴈岫行春天近蓬山玉檻照西清之直風高  
湘水朱旗壯南國之游童竹生驩騷蘭出色恭惟某官  
山輝川媚雪跨霜懸遠景樓高拂西眉之意氣靈光殿  
炯接東魯之風流砥柱百川大車九軌金鑰玉珂之凌  
厲粉牆紫界之踰躓海荔晴雲曾度兩轡之影溪苔夜

雨尚留六轡之光卷紫氣於河球韜神芒於浦劍屈訪  
禹碑之竒字小凝韋戟之清香驅龍蛇放之菹春生敏  
手乘騏驥道夫路雷動先聲佇風幕之圍春聽今禱之  
歌暮朱陵道院暫分翠岳之輝碧落仙人行侍紅雲之  
近某牡驅何補鱗技已窮地帶九州輝最親於鄰燭月  
明千里影即對於明簪盥露云云朔風疊疊

回前人到任狀

小車戒曉猥隨竹馬之塵森戟臨風快覩梧鸞之彩纒

纒襟期之新雨煌煌手畢之華星封侯識荊州已諗度  
關之氣低頭拜東野願從開岳之雲儲謝輪囷刊酬梗  
槩

請前人到任宴

虎符新渥聿來聚軫之輝鴈嶠初春喜接浮關之氣粲  
梅花之照眼擷杜若以論心欲龜告朔之朝薄燕行春  
之色共剪西窻燭迎桃李之春風為酌北斗漿卷瀟湘  
之夜雨

送前人洗拂

露溶朱旆已空綠淨之塵烟淡繡隅莫侑清香之宴來  
新多喜飲至有曩花邊立馬竹裏行厨木末搴蓉聊將  
綿蕪水中采薜謾贊春容輜瀆知慚麾留為寵

謝前人招宴致語

衡陽虎竹之春新輝碧落湘水燕花之夜共醉清吟藹  
僕介之倡酌發伶倫之掄詠恭惟某官黃鍾䟽越丹井  
甘寒咳唾珠璣五鳳樓之錯落擊撞金石九龍簾之春

容妙言語之齊諧寄音容於趙舞其味深登席寵復歌  
詩相如文豈類俳敬肅齊心之謝魯侯永錫難老莫酌  
思樂之章什襲意長七襄辭訥

送前人特會折俎

慶禋戟之遙臨幸依香燕講尊彝之特試敢去餼羊折  
騷客之芳聲效野人之綿蕝樂無聲禮無體聊寓慙勤  
北有斗南有箕相望清淺志志持瀆盼盼麾留

回前人送物



詹新府之檐惟有光下隰來美人之錦繡於梁西珍庭  
實生香江空出色綠文赤字徒深什襲之榮青玉明珠  
莫寓七襄之報填膺多謝待面縷陳

回前人賀雪

行湘水之春天開光霽呼霍山之雪風起繽紛手提五  
袴之温心出六花之瑞幻塗鴉之玉界賞回鴈之璫田  
清憶廣平公莫形容於天巧白戰潁水上預贊詠於年

豐

回前人饋歲

官居佳節坐閱壘茶兵衛清香特分滫瀡來使華於千  
乘雜侯餽之八珍喚醒春意之繽紛倍覺寒聲之辟易  
歌椒頌而懷杜甫隄贊凝森持梅花以謝廣平莫酬清  
絕

謝前人聚宴折俎

諸侯應郎宿之躔來從劍外太史奏德星之聚偶與席  
間傳風味於鄘湖斂陽和於楚觀黃堂一杯酒良佩交

情青烟五侯家  
駟謝臆

送前人聚宴折俎

凝香森衛戟  
近揖春和舉  
瓢酌天漿有  
懷星聚爰采  
澗溪之末薄  
陳俎豆之前  
為細民斟  
隄想賦西園  
之雪從太守  
樂駕言隨東  
野之雲瀆  
餉懷慚麾  
留為幸

回前人賀正

斗指蒼龍轉  
陽和於雄律  
尊分白獸來  
瑞氣於雌堂  
曉酣柏葉之  
秀暖轉梅花  
之色稱壽觥  
而頌魯散作  
春和

下褒璽以徵黃佇看天渥有華什襲莫報七襄

回前人請元宵宴

麗譙龍炬春輝左角之星碧落燕香夜對西眉之月特  
枉金玉章之旣許從雲霞佩之遊遠建章立通明預祝  
六鼇之宴醉長沙行湘水且聽五馬之謠

請前人元宵宴

轉西樓之梅月喜對銀花持北斗之桂漿擬陪畫戟僭  
卜仍圓之夕共流引滿之霞敲鐵馬之春冰肯來楚觀

賦石屏之夜燭細說巴山

回前人請聚宴

虛危出福星光生鴈嶠斗牛有紫氣喜動燕香為開北海之尊如會長沙之節益者三友懷練錦之新輝襄我二人歌緇衣之永好感深緹襲愧後刊酌

除贛守回宋衡州袖劄請宴

馳隰何功沐崆峒之新雨秩筵有命開岫嶺之春風鏗然出銜袖之音為我助回車之喜江湖千里將聯麾影

之光桃李一杯尚聽襦歌之譜彌襟傾感走筆刊酬

請前人宴

太行望吾親舍偶遂陳情合江和使君詩正堪握手敬  
龜明日薄燕清風銜杯接慇懃聊盡湘行之趣上堂拜  
家慶敢忘穎錫之私徼惠賁然坐邀慙甚

請前人別會

致節言歸借未光於郎錦飛花執別馳遠夢於客帆小  
湔袞於詰朝更徘徊於勺水日暮碧雲合不勝乍遠之

情月明今宵多且盡相親之興坐邀凌躡惠肯知榮

回前人還請

把太守之新符獲傳民譜問征夫以前路乃辱祖筵方  
繾綣於飛花更慙慙於折柳南有箕北有斗所願挹漿  
君向湘我向秦若為聞笛懷哉傾倒帥是刊酌

謝送禮物

捧檄江城喜圍二天之照折梅驛使歡傳千里之音煌  
煌麾節之夏盟纚纚雲仍之新好某官誼隆金石香溢

芷蘭誰將西歸懷之好音莫殫深謝詩曰不匱永錫爾  
類惟戴殊知蒞禮將忱覲顏匪報

道胡都承石壁

四臬湖南余征上日樞衣洛下伊邇中台亟裁書而敎  
心將考德而問業恭惟某官出入文武闔闢樞機龍虎  
變化山林高深間出魁傑冰雪聰明雷霆精銳獨步艱  
難肯綮十九年而刃如新扶搖九萬里而風斯下連麾  
江海春浮五袴之聲疊節東南星度六絲之影自任以



天下之重獨賢於王事之勞金署犀監之翱翔奎殿紫  
樞之凌厲赫奕將磨於浯石逍遙遽薄於蓬萊此聲梁  
楚之間英雄籍甚長江南北之限人物眇然馳旌夜召  
於長沙乘驛曉行於湘水並躋兩地試韓范之規模弘  
濟中天遡趙張之事業某味方酣於吸菽夢不到於覆  
蕉換烟雨之綠簑方深澗媿起波濤之舊繡曷稱臺容  
緬懷冀北之風喜近高陽之里王尊九折坂願聞叱馭  
之規元龍百尺樓即展下牀之拜登龍在望濡兔莫殫

回楊祕監就賀

貳書壁府晉譜金華太乙藜青煥玉山之黼黻邇英槐  
翠照丹井之綸絲開岳雲回度墀春早恭惟某官岷峨  
一壁關路單傳玉井冰輪洒落神仙之韻簫鐘瑤簾和  
平典則之音自歛起而霆轟每徐行而山立稱真侍講  
在淳夫正叔之間號小司成負安定康侯之望雉監沐  
天光之近螭坳居地望之嚴羞崑崙而薄蓬萊枕湘江  
而會瀟水萬家燈火雨籠絃誦之聲千里桑麻雲度袴

襦之曉君不准陽之薄上深渤海之嘉圖書歸領於瀛  
洲鐘鼓行尋於長樂銅印水蒼佩並紆宣室之思白馬  
金盤陀浸近文昌之拜某相望千里一別六年綠蓑風  
雨之中方茲餐菊舊繡波濤之後復爾夢蕉喜追東海  
之龍來趁衡陽之鴈恍絕塵而矐後乘半夜之台前懷  
駟駱之載馳敢安絲轡騎騏驥以先路遙想雲旗贄賀  
葵葵刊酌草草

通丁侍郎應奎

號瑣  
溪

誤節讞湘馳驅上日摠衣過洛咫尺中台拜下有期恭  
先告至恭惟某官黃河泰山之望咸池大護之音學問  
單傳安定公之蘊奧文章獨步歐陽子之聲名空萬馬  
以無前領衆星而直上慷慨玉廬之給札聯翩璧府之  
彰纓一麾江海以翱翔載駕風雲而磅礴翠帷麟觀螭  
陛鸞臺天子穆穆以親賢海內顛顛而望賜方千仞翔  
而覽下乃六月息以圖南規如聖哲馳騫之秋正切廊  
廟論思之益胡不起金魚而垂帶而乃新瑤象以為車

弭節愈穹履星采近賈生見宣室亟紆半夜之思安石  
起東山大衍蒼生之福某相望千里一間十年綠蓑風  
雨之中菊餐有味舊繡波濤之地蕉夢何心詎期漢節  
之來喚醒楚騷之讀寅緣道德親切依仁瀟湘逢故人  
尚軫蓬鬢之舊霖雨思賢佐佇看芝鳳之新傾耳一言  
拜手三肅

通楊提刑允恭

號高峯

誤節讞湘載驅上日摠衣過洛伊適下風望履有期擘

賤告至欽惟某官溟南健翮斗北修名玉尺冰莖洒落  
絕塵之韻瑤琴錦琴和平瑞世之音自歛起而霆轟每  
徐行而山立提振春陵之風月縱橫周序之鼓鐘日暖  
旌旗一麾玉帳春明霄漢三道繡衣馳驅靡憚於賢勞  
出入有關於民命方千仞翔而覽下乃六月息以圖南  
矧今聖哲馳驚之秋正切英雄經濟之畧江濤如許泉  
石謂何召賈誼於長沙上心久渴見夷吾於江左天下  
何憂其飲菊悠然夢蕉儻爾起家乘傳念舊繡之波濤

畏道向車想綠蓑之風雨幸近十洲之島冀沾九里之  
河滕壤舊屢曾識平反之譖周原新轡願承鞭辟之方  
拜下非遙由中莫既

回李安撫肯齋

叨臬湘南余征上日摠衣洛下伊邇中台並裁書而敘  
心將考德而問業恭惟某官名門人傑昭代吏師醴泉  
芝草麒麟天生瑞質高山深林龍虎代出魁人見謂西  
珍蔚為南望自覽德翔千仞而下即回瀾障百川之東

粉墻紫界之踰躡玉檻丹梯之凌厲連塵江海風馳五  
袴之聲疊節荆吳星度六絲之影以天下而自任何王  
事之獨勞迨授鉞於千畿乃進書於九扈俄動平地神  
仙之想來尋往時鐘鼓之盟湘水春深未許放情於黃  
老虞廷日永行看翔舞於夔龍某飲菊悠然夢蕉儻爾  
起家乘傳念舊繡之波濤畏道回車想綠蓑之風雨幸  
近十洲之島冀沾九里之河滕壤舊廛曾識平反之譜  
周原新轡願承鞭辟之方拜下非遙由中莫既



回前人賀遷秩

影廩下隰奚補毫釐步進員階忽饒分寸未謝玉淵之  
潤先厪金薤之華自笑竿魚為官何拓落也尚隨書鶴  
振德而輔翼之未悉刊酌餘圖嗣布

送前人冬

仄管移新律暖轉蒞蘭鍾鼓樂清時春生花竹隔幔緹  
之醲郁阻履韞之從容薄注鄴清式歌魯瑞俯慚雲繡  
又添愛日之紋踰聽雷叢趣侍含光之宴微芹馳瀆采

菲知榮

賀前人冬

黃鍾噓暖繡線紀長錦堂增履韞之春綠野換荔芸之色  
某謾馳今雨阻造下風隄睇翠蓬莫遂前茅之拜第  
瞻鶴燄早催元會之朝

餽前人歲

朱泥知歲驚殘爆竹之寒綠野回春煥起屠蘇之曉欲  
贊喧馬散鴉之集曾微鱉卧兔之供栢葉浮香隄想

午橋之宴梅花轉暖即迎卯詔之來輜瀆包羞麾留為  
寵

賀前人正

攝提貞孟陬春回甲胄祝融接天柱雲度午橋元氣與  
游壽祺來介某官泰內君子西方美人樂鐘鼓於園林  
聲和綠淨拜衣冠於閭闔光近清都表新渥於鶴書催  
穹班於鼇禁某迹靡俗駕心遠賀牀星遙指於軫中拳  
拳公壽雪立殘於門外耿耿予懷

送前人元宵

火樹銀花簇朱陵之明月羅幃繡幕開綠野之春風莫  
陪鐘鼓之勝遊敬效豆籩之攝飲醉長沙行湘水忍賦  
岸花遶建章立通明佇依雲朵區區輶瀆盼盼麾留

賀前人納子婦

歡聲噪鵲喜氣乘龍日耀屏金春生堂錦伏惟歡抃某  
永塵賀履敢後慶箋猥此將芹菲然采若倘蒙鑒茹無  
任欣榮

送前人別會

楚節易麾有味林鳥之哺湘花舞席踰瞻湖鴈之飛感  
水薤之風規持金蕉而雨別日暮碧雲合耿河漢之相  
忘月明今霄多勞江湖之遠夢薄言折寄徽惠麾留

謝章菴書鑑

綿田負耒投分一丘楚澤乘輶飯枕兩地公造化吹噓  
之賜廣詳明欽恤之仁昉履南維輒箋西筦伏念某遭  
逢雖早零落亦多一壑白雲對哺鳥而俯仰十年流水

忘夢鹿之去來不圖元日之會同猶記壯年之奔走我  
牛我車我輦方隨影於湘波維駒維駱維駟胡強顏於  
衡麓未許賦東方之粟乃趣泄南冠之囚尊叱馭陽回  
車展轉於君親之際奉明刑契敷教劑量於政化之間  
吏民甫接於咨詢風俗重為之感激龍蛇行而赤子瘁  
羔羊泯而素絲傷非扶內地之本根曷壯重湖之保障  
曹歲之戰長勺或云察魯獄之功孔明之駐臨蒸正在  
破荆賊之後恍聞風而興起凜受命之艱難茲蓋恭遇

某官德業兩朝人物三代頌慶厯之聖德政府經綸用  
淳熙之真儒中天黼黻誕薦緇衣之造齊調金鼎之和  
遂沐匿瑕亦叨將指某敢不靈承清問惠迪嘉師奉使  
登車敢自詭范滂之操為親拜表尚曲全李密之私激  
切未央敷榮祇淺

先生前除湖南漕即報罷復除本路憲道體堂謹  
書

謝高尚書斯得

負耒耕綿方省愆於私室乘輅使楚忽拜命於公朝助  
履朱維敬箋丹屏伏念某同前茲蓋恭遇某官拱璧元  
圭泰山喬嶽邇英殿之勸講總是經綸古靈臺之薦人  
不遺氣類遂令起廢復忝司平某敢不迪惠嘉師靈承  
清問鞭辟虺隤之陳迹濯磨鞅掌之新功自與心謀  
敢比范滂之攬轡未以罪去尚容李密之陳情歸倚方  
長敷菘祇淺

謝陳尚書宜中



耕綿負耒方私室之省愆使楚乘軺忽公朝之錫命既  
履朱維而陳臬並瞻紫橐以修辭伏念某學極支離性  
惟骯髒宿昌黎之南斗自嘆我辰事元亮之西疇每懷  
前路撫陳編而慷慨恍初服之流離題柱而乘駟車不  
量已力叱馭而馳九坂徒負壯心山川尚有於鬼神草  
木自全於霜露迹已陳於芻狗影屢落於杯蛇一壑白  
雲十年流水當元會彰綸於日月乃一朝移繡於波濤  
血指創深貽羞巧匠折肱痛定莫詭良醫請東方之粟

以閔俞為南冠之囚而趣載周爰伊始汔濟奈何起觀  
今日之重湖正抵北風之一面曹劌之戰長勺或云察  
魯獄之功孔明之駐臨蒸正在破荆賊之後歛聞風而  
興起凜受命於艱難茲蓋恭遇某官大呂黃鍾元圭拱  
璧天章閣之論事行展經綸古靈稟之薦賢不遺氣類  
遂令起發復忝司平某敢不激厲新知濯磨舊玷沐浴  
蓬萊之風路昭蘇蘅芷之江山皇帝清問何擇非人願  
言奉教王事靡盬不遑將母儻遂陳情歸倚意長敷宣

喙短

文山集卷十